

Saturday, February 7, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



MIZORAM STATE PROJECT MONITORING COMMITTEE

Mizoram State Project Monitoring Committee hnuaia monitoring team chuan mipui mamawhna sang tak avangin North Vanlaiphai Water Supply Scheme chu thla thara zo hman turin contractor te an ngen.

Nimina Mizoram State Project Monitoring team in a hmuna an tlawhnaah contractor te hi tun aia nasa leh chak zawka hna thawk turin an chah a. Project an endiknaah hian endik hna an thawh hmain thutkhawm an buatsaih hmasa a. Hetah hian an endik dan turte sawifiahin thutkhawmah hian North Vanlaiphai Water Supply Scheme hna kal mek chu a zawh hun a ni tawh naa harsatna hrang hrang avanga zawh a la nih loh dan a sawifiah a ni a. Endiktu team te chuan an endikna turah khawtlang hruaitu kalkhawmte leh hnathawktu te chu an duh dan leh thil an kalpui dan dik tak sawi lang turin an ngen bawk a ni.

He pump hi ni khatah darkar 16 pump thei tur a beisei niin, tui cubic metre 720 pump thei tur a ngaih a ni a. He endiknaah hian Mizoram State Project Monitoring Committee member Er. Duhkima, Er. R. Romawia, Er. Vanlalhruaia leh Er. Remlalmuanpuia bakah Task Force member Pi Vanchhungi leh Contractor leh hnathawktute an tel a. Anni bakah hian N.Vanlaiphai VC I leh II, YMA leh khawtlang mipuite an tel a ni.



CYMA

Central YMA President Pu R. Lalngheta chuan Mizote inpumkhatna turin chibing te te a in la hrang lova hmun khata awm a pawimawh thu a sawi.

Nizana Manipur Group YMA Inkhawmpui Vawi 41-na Central YMA hruaituten an hmanpuinaah he thu hi sawiin CYMA President chuan Mizo te chu hnam tlem an nih thu sawiin YMA chuan hnam tlemte chu pumkhata a awm a duh ber thu a sawi a. Inpumkhat turin mitin an pawimawh tih sawiin chibing te tea inla hrang lovin hmun khata awm a pawimawh tih a sawi a.

Mizoah hnam hrang hrang an awm thu sawiin unau theuh theuh unau an nih inhriaa indo lo turin a chah a. Mizo hnam peng hrang hrangten an tawng theuh humhalh se a duh thu a sawi a, chutihrualin inbiakpawhna tlanglawn erawh thiam tlan tul hle a a hriat thu a sawi a ni. CYMA President chuan ruihhlo do chungchangah tanrual a ngai hle tih sawiin ti hne hne lova huai taka ruihhlo do turin YMA member te a sawm a ni.



KOHHRAN HMEICHHIA INKHAWMPUI

Mizoram Presbyterian Kohhran hnuaia hmeichhe pawl, Kohhran Hmeichhia te chuan Mizoram leh pawna Bial hrang hrangah Bial Kohhran Hmeichhe Inkhawmpui chu nizan atang khan an tan a, Pathianni zanah a tiak ang.

Nizan khan palai lawm leh report pualin inkhawm buatsaih a ni tlangpui a. Vawiin nileng hian Rorel a ni a, zanin atangin Pathianni zan thleng vantlang Pathian Biak Inkhawm an buatsaih leh dawn a ni.

Bial thenkhatah chuan thupui thlan bik neiin zanin atang hian Speaker ruaiin Speaker te'n inkhawm apiangin thuhiril hna an thawk ang a. Bial thenkhatah chuan Bial hruaituten thuhiril hun an insem dawn thung a. Bial thenkhatah chuan Pathianni chawhnuah Lalpa Zariah Sacrament inkhawm buatsaih a ni ang a, chawhnu inkhawm banah fellowship hmang tur an awm rualin mual inkhawm buatsaih tur an awm a. A tlangpuiin Inrinni Rorel tlaiah rorel palai ten ruai an theh ang a, Pathianni tlaia ruai theh tur an awm bawk a ni.



AI SUMMIT

Ni hnih awh Artificial Intelligence (AI) Regional Pre-Summit, Indian Institute of Mass Communication (IIMC), Aizawla buatsaih chu nimin khan khar a ni.

Tunkar Ningani atanga tan AI leh Media tih thupui hmanga AI Pre-Summit huaihawt hi India AI impact Summit 2026 lo awm tur atana India hmun hrang hranga a bultanna tura lo buatsaih hmasak a ni a. IIMC Aizawla buatsaih pawh hi IIT, Bombay leh sorkar laipua Ministry of Electronics & Information Technology te nena buatsaih a ni a.

AI Pre-Summit-ah hian Mizoram University Department of Mass Communication atangin Professor Irene Lalruatkimi, MZU IT Department atangin Associate Professor Dr. R. Chawngsangpuii, IIT Bombay-a Data Manager Nitish Singh, The Frontier Despatch Editor Pu Adam Sapransanga, Marketing lam mithiam Pi Angela Roy, Tech Influencer Pu Caleb Friesen leh IIMC Assistant Professor Dr. Jharna Brahma te'n Artificial Intelligence chungchang chu anmahni hna leh subject hawi zawngin kawng hrang hrangin an sawi a. Mizoram University leh pawn lam atangin zirlai, research scholar leh AI kaihhnawih company hrang hrang atangin mipui an kalkhawm a. Mithiamte leh kalkhawm mipuiten sawihona hun an hmang bawh a. Nimin khan Workshop buatsaih a ni thung a ni.

